



O'ZBEKISTON RESPUBLIKASI VAZIRLAR MAHKAMASINING QARORI

20 21 yil « 19 » may

№ 310

Toshkent sh.

Халқаро IT-сертификатларга эга ёш мутахассисларни қўллаб-қувватлаш чора-тадбирлари тўғрисида

Ўзбекистон Республикаси Президентининг 2021 йил 3 февралдаги ПФ – 6155-сон Фармони билан тасдиқланган “2017 – 2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини “Ёшларни қўллаб-қувватлаш ва аҳоли саломатлигини мустаҳкамлаш йили” да амалга оширишга оид давлат дастури” ижросини таъминлаш, шунингдек, ёшларни ўқитиш ва уларнинг халқаро IT-сертификатларини олиш учун 50 фоизгача харажатларини қоплаш тизимини жорий этиш мақсадида Вазирлар Маҳкамаси **қарор қилади:**

1. 2021 йил 1 июндан бошлаб ёшларнинг халқаро IT-сертификатларини олиш харажатларининг 50 фоизгача бўлган қисмини қоплаб бериш тартиби жорий этилсин.

2. Ёшларнинг халқаро IT-сертификатларни олиш харажатларининг 50 фоизгача бўлган қисмини қоплаб бериш мақсадида Дастурий маҳсулотлар ва ахборот технологиялари технологик парки дирекциясининг Ўзбекистон Республикаси Молия вазирлигининг Ғазначилигида алоҳида шахсий ғазна ҳисобварағи (кейинги ўринларда – шахсий ҳисобварақ) очилсин.

Бунда, шахсий ҳисобварақ маблағлари 2021 йилда Ўзбекистон Республикасининг республика бюджетидан биринчи даражали бюджет маблағларини тақсимловчи сифатида Ахборот технологиялари ва коммуникацияларини ривожлантириш вазирлигига ажратилган маблағлар ҳамда соҳа ташкилотлари маблағлари доирасида, 2022 йилдан бошлаб эса – Ўзбекистон Республикаси Давлат бюджети параметрларида назарда тутилган манбалар ҳисобидан шакллантирилади.

3. Халқаро IT-сертификатларга эга ёшларнинг ўқиши ҳамда уларнинг халқаро IT-сертификатларни олиши учун сарф қилган харажатларининг 50 фоизгача бўлган қисмини молиялаштириш учун масъул ваколатли орган этиб – Ахборот технологиялари ва коммуникацияларини ривожлантириш вазирлиги, ишчи орган этиб – Дастурий маҳсулотлар ва ахборот технологиялари технологик парки дирекцияси белгилансин.

Бунда:

а) шахсий ҳисобварақнинг тушумлари ва харажатларининг йиллик параметрларини, уларнинг ижроси тўғрисидаги йиллик ҳисоботларни, йиллик иш режаларини тасдиқлаш;

эҳтиёжларни ўрганиш асосида республикада талаб юқори бўлган халқаро IT-сертификатлар ва ушбу сертификатларни тақдим қилувчи компаниялар ҳамда Global Knowledge компанияси томонидан ҳар йили шакллантириладиган халқаро IT-сертификатлар рўйхатига асосан тасдиқлаш;

шахсий ҳисобварақнинг маблағларини шакллантириш ва улардан фойдаланиш билан боғлиқ жараёнлар ваколатли орган томонидан амалга оширилади;

б) республикада ёшларнинг халқаро IT курсларда ўқиш ва халқаро IT-сертификатларга бўлган эҳтиёжини ўрганиш ҳамда халқаро IT-сертификатлар олиш учун сарф қилган харажатларини қоплаб бериш юзасидан мурожат қилган ёшларнинг ҳужжатларини кўриб чиқиш ва кўриб чиқиш якуналари бўйича хулоса тайёрлаш ишчи орган томонидан амалга оширилади.

4. Халқаро IT-сертификатларга эга ёшларни ўқиши ҳамда уларнинг халқаро IT-сертификатларни олиши учун сарф қилган харажатларининг 50 фоизгача бўлган қисмини молиялаштириш тартиби тўғрисидаги низом иловага мувофиқ тасдиқлансин.

5. Ахборот технологиялари ва коммуникацияларини ривожлантириш вазирлиги 2021 йил 1 августга қадар:

а) Вазирлар Маҳкамаси ҳузуридаги Таълим сифатини назорат қилиш давлат инспекцияси, “Эл-юрт умиди” жамғармаси билан биргаликда “Ўзбекистоннинг IT-истеъдодлари” порталига (кейинги ўринларда – Портал) қуйидагиларни жойлаштириш чораларини кўрсин:

халқаро IT-сертификатларнинг ихтисослашуви ва йўналишлари ҳамда халқаро IT-сертификатларни олиш тартиби;

халқаро IT-сертификатлар учун тўланиши зарур бўлган тўловлар миқдорлари ва уларни тасдиқловчи ҳужжатларни тақдим этиш тартиби;

халқаро IT-сертификатлар беришга ихтисослаштирилган хорижий, маҳаллий ва республика компанияларининг ва таълим муассасаларининг расмий веб-сайти тўғрисидаги маълумотлар;

халқаро IT-сертификатга эга бўлган ва ушбу қарор ижроси бўйича рағбатлантирилган ёшлар тўғрисидаги маълумотлар;

б) Портал орқали халқаро IT-сертификатга эга бўлган талабгор ёшларнинг аризаларини қабул қилиш учун зарур ҳужжатлар ва бошқа ҳужжатларнинг намунавий шакллари ҳамда бланкаларини ишлаб чиқсин ва тасдиқласин.

6. Ахборот технологиялари ва коммуникацияларини ривожлантириш вазирлиги, Олий ва ўрта махсус таълим вазирлиги, Вазирлар Маҳкамаси ҳузуридаги Таълим сифатини назорат қилиш давлат инспекцияси, “Эл-юрт умиди” жамғармаси 2021 йил 30 октябрга қадар белгиланган тартибда Муҳаммад ал-Хоразмий номидаги Тошкент ахборот технологиялари университети, Тошкент шаҳридаги Инха университети, Тошкент шаҳридаги Амити университети ҳамда ахборот-коммуникация технологиялари соҳаси учун кадрлар тайёрлайдиган таълим муассасаларида халқаро IT-сертификат тақдим қилувчи тегишли ташкилотларнинг аккредитациядан ўтган сертификатлаш марказлари ҳамда ўқув курсларини ташкил қилиш чораларини кўрсин.

7. Вазирликлар ва идоралар, маҳаллий ижро этувчи ҳокимият органларига ихтисослаштирилган таркибий бўлинма лавозимларига ишга қабул қилишда халқаро IT-сертификатларга эга ёш мутахассисларга (номзодларга) устунлик берилиши тавсия этилсин.

8. Ахборот технологиялари ва коммуникацияларини ривожлантириш вазирлиги манфаатдор вазирликлар ва идоралар билан биргаликда ўзлари қабул қилган норматив-ҳуқуқий ҳужжатларни бир ой муддатда ушбу қарорга мувофиқлаштирсин.

9. Мазкур қарорнинг бажарилишини назорат қилиш Ўзбекистон Республикаси Бош вазири маслаҳатчиси – IT-технологиялар, телекоммуникациялар ва инновацион фаолиятни ривожлантириш масалалари департаменти бошлиғи О.М. Умаров, ахборот технологиялари ва коммуникацияларини ривожлантириш вазири Ш.М Садиков ҳамда молия вазири Т.А. Ишметов зиммасига юклансин.

**Ўзбекистон Республикасининг
Бош вазири**



А. Арипов

Вазирлар Маҳкамасининг
2021 йил 19 май даги 310-сон қарорига
илова

**Халқаро IT-сертификатларга эга ёшларнинг ўқиши ҳамда уларнинг
халқаро IT-сертификатларни олиш учун сарф қилган харажатларининг
50 фоизгача бўлган қисмини молиялаштириш тартиби тўғрисида
НИЗОМ**

1-боб. Умумий қоидалар

1. Ушбу Низом Ўзбекистон Республикаси Давлат бюджети маблағлари ҳисобидан халқаро IT-сертификатларга эга ёшларнинг ўқиши ҳамда уларнинг халқаро IT-сертификатларни олиши учун сарф қилган харажатларининг 50 фоизгача бўлган қисмини молиялаштириш тартибини белгилайди.

2. Ёшларнинг халқаро IT-сертификатларни олиш учун 50 фоизгача харажатларини қоплаб бериш ушбу Низомга иловада келтирилган схемага мувофиқ амалга оширилади.

3. Ушбу Низомда қуйидаги асосий тушунчалар қўлланилади:

ваколатли орган – Ахборот технологиялари ва коммуникацияларини ривожлантириш вазирлиги.

ишчи орган – ваколатли органнинг ташкилий вазифаларини амалга оширувчи Дастурий маҳсулотлар ва ахборот технологиялари технологик парки дирекцияси;

ёшлар – ўн тўрт ёшга тўлган ва ўттиз ёшдан ошмаган шахслар;

портал – Ўзбекистон Республикаси Президентининг “Ахборот технологиялари соҳасида таълим тизимини янада такомиллаштириш, илмий тадқиқотларни ривожлантириш ва уларни IT-индустрия билан интеграция қилиш чора-тадбирлари тўғрисида” 2020 йил 6 октябрдаги ПҚ–4851-сон қарори билан ишга туширилган “Ўзбекистоннинг IT-истеъдодлари” портали;

талабгор – халқаро IT-сертификатларга эга бўлган Ўзбекистон Республикасининг фуқароси;

халқаро IT-сертификатлар – ваколатли орган томонидан тасдиқланган ахборот тизими бошқаруви, маълумотлар базаси ва “булутли” платформани бошқариш, ахборот хавфсизлигини таъминлашга оид республикада ва чет элда олинган халқаро IT-сертификатлар;

верификация – талабгор томонидан тақдим этилган халқаро IT-сертификатнинг ҳақиқийлигини масъул ваколатли органнинг электрон тизими орқали текшириш.

2-боб. Талабгорларнинг ҳужжатларини қабул қилиш

4. Талабгорлар томонидан тўлдириладиган ариза шакли ваколатли орган томонидан тасдиқланади ва ишчи органнинг расмий веб-сайти ҳамда Порталга жойлаштирилади.

5. Талабгор халқаро IT-сертификат олиш учун қилинган харажатларининг 50 фоизгача бўлган қисмини қоплаб бериш юзасидан Порталда электрон ариза бериб рўйхатдан ўтади.

6. Рўйхатдан ўтиш учун талабгор порталга қуйидаги ҳужжатларни киритиши лозим:

фуқаролик паспорти (фуқаролик паспорти бўлмаган тақдирда туғилганлик тўғрисидаги гувоҳнома) ёки идентификация ID-картаси, рангли фотосуратнинг электрон шакли (туғилганлик тўғрисидаги гувоҳнома билан мурожаат қилганда);

талабгорнинг халқаро IT-сертификат олиш учун сарф қилган харажати тўланганлигини тасдиқловчи тўлов квитанцияси нусхаси;

халқаро IT-сертификат нусхаси;

қопланиши зарур бўлган маблағлар қайси ҳисобвараққа йўналтирилиши ҳақидаги маълумотлар;

Талабгор рўйхатдан ўтиш жараёнида Порталга халқаро IT-сертификат олишга ва/ёки халқаро IT-сертификат олиш учун ўқув курсига тўлов (харажат)ларнинг аниқ миқдорини, шунингдек, халқаро IT-сертификат тақдим қилувчи тегишли ташкилотларнинг аккредитациядан ўтган сертификатлаш марказлари, ўқув марказларидан халқаро IT-сертификат олиш учун ўқиганлигини ва ўқув курсини тамомлаганлигини тасдиқловчи ҳужжатларни илова қилиши лозим.

Талабгордан ушбу бандда назарда тутилмаган ҳужжатларни талаб қилишга йўл қўйилмайди.

Талабгор ҳақидаги маълумотларнинг тўғрилигига талабгорнинг ўзи шахсан жавоб беради.

7. Талабгорлар Порталдан бепул рўйхатдан ўтади.

3-боб. Талабгорларнинг ҳужжатларини кўриб чиқиш

8. Ишчи орган талабгорнинг аризасини зарур ҳужжатлари билан бирга беш иш куни мобайнида кўриб чиқади ҳамда талабгор томонидан тақдим қилинган халқаро IT-сертификатни верификациядан ўтказди.

Агар халқаро IT-сертификатнинг ҳақиқийлигини верификация орқали аниқлашнинг имкони бўлмаса, ишчи орган халқаро IT-сертификат тақдим қилган ташкилотга ушбу сертификатнинг ҳақиқийлиги юзасидан сўров юборади. Бунда ишчи орган томонидан сўров юборилганда, халқаро IT-сертификатнинг ҳақиқийлигини аниқлаш муддати 30 календарь кунга узайтирилади.

9. Қуйидаги ҳолатларда:

верификация ёки халқаро IT-сертификат тақдим қилган ташкилотга юборилган сўров натижасига кўра ушбу сертификатнинг ҳақиқий эмаслиги аниқланганда;

халқаро IT-сертификат тақдим қилган ташкилотга юборилган сўровга жавоб олинмаганда ишчи орган томонидан талабгорнинг аризасини қаноатлантIRMасдан қолдириш тўғрисида қарор қабул қилинади.

10. Ишчи орган томонидан халқаро IT-сертификат тақдим қилган ташкилотга юборилган сўровга 30 календарь кун ичида жавоб олинмаганда, шунингдек, халқаро IT-сертификатнинг ҳақиқий ёки ҳақиқий эмаслиги ҳақида кечикиб жавоб олинганда ишчи орган бу ҳақида Портал орқали СМС юбориш орқали талабгорни хабардор қилади.

Бунда халқаро IT-сертификатнинг ҳақиқийлиги тегишли ташкилот томонидан 30 календарь кундан кейин тасдиқланганда талабгор мазкур Низом талабларига мувофиқ такроран мурожаат этмасидан унга тегишли харажатлар тўлаб берилади.

Ишчи орган талабгор томонидан тақдим қилинган ҳужжатларга ойдинлик киритишни талаб қилиш ҳуқуқига эга.

11. Муқаддам халқаро IT-сертификатларнинг бир тури бўйича халқаро IT-сертификат олиш харажатининг 50 фоизгача бўлган қисми қопланган талабгорнинг халқаро IT-сертификатларнинг айнан шу тури бўйича такроран қилган харажатлари қопланмайди.

Муқаддам халқаро IT-сертификатларнинг бир тури бўйича халқаро IT-сертификат олиш харажатининг 50 фоизгача бўлган қисми қопланган талабгор халқаро IT-сертификатларнинг бошқа тури бўйича минимал кўрсаткич ёки ундан юқори натижа қайд этса, унга ушбу Низом талабларига мувофиқ халқаро IT-сертификат олиш харажатининг 50 фоизгача бўлган қисми тўлаб берилади.

12. Ўн олти ёшга тўлмаган фуқароларнинг халқаро IT-сертификат олиш харажатининг 50 фоизгача бўлган қисми қоплаб берилишини сўраб ушбу фуқароларнинг қонуний вакиллари мурожаат қилишлари мумкин.

Бунда тегишли харажатлар ушбу Низом талабларига мувофиқ ўн олти ёшга тўлмаган фуқароларнинг қонуний вакилларига тўлаб берилади.

13. Ишчи орган талабгор ҳужжатларини умумлаштириб, молиялаштириш юзасидан таклифларни беш иш куни ичида ваколатли органга келишиш учун киритади.

Ишчи орган ёшларни халқаро IT-сертификатлар учун ўқиши ва/ёки халқаро IT-сертификатлар олиш харажатларининг қопланиши лозим бўлган аниқ миқдори (50 фоизгачаси)ни белгилашда ушбу халқаро IT-сертификатнинг бошланғич, ўрта ва профессионал даражасига оид мезонларни инобатга олиши лозим.

14. Ишчи орган ўз хулосасини тайёрлашда ахборот-коммуникация технологиялари соҳаси бўйича фаолият юритувчи олий ва илмий-тадқиқот таълим муассасалари, вазирликлар, идоралар ва бошқа ташкилотлардан тақдим этилган ҳужжатларнинг ҳақиқийлигини аниқлаш чораларини кўришга ҳақли.

Халқаро IT-сертификатга эга бўлмасдан туриб талабгорнинг халқаро IT-сертификати олиш учун ўқув курсига тўлаган харажатлари қопланишига йўл қўйилмайди.

15. Ишчи орган томонидан киритилган таклифлар ваколатли орган томонидан уч иш куни ичида келишилади.

4-боб. Талабгор харажатларини молиялаштириш

16. Ваколатли орган томонидан таклифлар келишилгандан сўнг ишчи орган бир иш куни ичида тегишли маблағларни талабгорга ўтказиб бериш юзасидан буюртманомга тайёрлайди.

17. Ишчи орган уч иш куни мобайнида халқаро IT-сертификатларни олиш учун сарфланган харажатларнинг бир қисмини қоплаш учун тегишли пул суммасини талабгор томонидан кўрсатилган тегишли ҳисобвараққа ўтказиб беради.

Талабгорнинг хоҳишига кўра ушбу ҳаражатлар нақд ёки нақд пулсиз шаклда тўланиши мумкин.

18. Ишчи орган молиялаштирилган халқаро IT-сертификатлар ва уларнинг эгалари ҳақидаги маълумотларни молиялаштириш тўлиқ яқунланганидан кейин уч кун ичида улар Порталга қўйилишини таъминлайди.

19. Портал Ишчи орган томонидан юритилади ва техник жиҳатдан қўллаб-қувватланади.

5-боб. Апелляция комиссияси

20. Ишчи орган томонидан ҳужжатлари кўриб чиқилиши яқунларига кўра салбий қарор чиқарилган талабгорлар ваколатли органга апелляция бериш ҳуқуқига эгадир. Апелляция ёзма шаклда тақдим этилади.

21. Апелляцияни кўриб чиқиш учун ваколатли орган томонидан Апелляция комиссияси ташкил қилинади.

22. Апелляция комиссияси беш кун муддат ичида берилган апелляцияни даъвогар иштирокида кўриб чиқиши ва тегишли қарор қабул қилиши зарур. Апелляция комиссиясининг иши баённома билан расмийлаштирилади. Баённома апелляция комиссиясининг барча аъзолари ва даъвогар томонидан имзоланади.

23. Қайта апелляцияга йўл қўйилмайди.

6-боб. Яқунловчи қоидалар

24. Эксперт кенгаши аъзолари ушбу Низомга мувофиқ харажатларини қоплаш тавсия этилган номзодларнинг ҳужжатлари холисона ва қонуний кўриб чиқилиши учун бевосита масъулдир.

25. Ушбу Низом талаблари бузилишида айбдор бўлган шахслар қонунчилик ҳужжатларида белгиланган тартибда жавоб берадилар.



Халқаро IT-сертификатларга эга ёш мутахассисларнинг ўқиши ҳамда уларнинг халқаро IT-сертификатларни олиш учун сарф қилган харажатларининг 50 фоизгача бўлган қисмини молиялаштириш тартиби тўғрисидаги илова

Ёшларнинг халқаро IT-сертификатларни олиш учун 50 фоизгача харажатларини қоплаб бериш СХЕМАСИ

Босқичлар	Субъектлар	Тадбирлар	Ижро муддатлари
1-босқич	Талабгор	Талабгор (ўн олти ёшга тўлмаган шахснинг қонуний вакили) Портал орқали рўйхатдан ўтиб мурожаат қолдиради.	Сертификат берилган санадан бошлаб 180 календарь кун мобайнида
2-босқич	Ишчи орган	1. Ишчи орган талабгорнинг ариза ва хужжатлари кўриб чиқади ҳамда талабгор томонидан тақдим қилинган халқаро IT-сертификатни верификациядан ўтказиши. 2. Талабгорнинг хужжатларини умумлаштириб, молиялаштириш юзасидан таклифларни ваколатли органга келишиши учун киритади. 3. Халқаро IT-сертификатнинг ҳақиқийлиги тасдиқланмаганда бу ҳақида талабгорга СМС орқали хабар юборади.	1. Хужжатлар тушган кундан бошлаб беш иш куни мобайнида. 2. Сертификатнинг ҳақиқийлиги тасдиқлангандан бошлаб беш иш кун мобайнида. 3. Сертификатнинг ҳақиқийлиги тасдиқланмагандан бошлаб бир иш кун мобайнида.
3-босқич	Ваколатли орган	Харажатларни молиялаштириш юзасидан киритилган таклифлар келишиб берилади.	Таклиф киритилгандан кейин уч иш куни мобайнида.
4-босқич	Ишчи орган	Талабгор кўрсатган ҳисобвараққа тегишли пул маблағларини йўналтиради.	Таклифлар ваколатли орган билан келишилгандан кейин тўрт иш куни мобайнида.